

牧山佐藤先生碑

東宮侍講正五位勲四等文學博士三島毅撰

先生姓佐藤氏諱楚材字晋用牧山雪齋皆其別字尾張中嶋郡山崎村人父曰太四郎母富田氏先生幼穎敏喜讀書擊劍劍師曰人立身在一技多岐則亡羊先生感悟自此一意從事斯學就鷺津松隱于丹羽河村乾堂于浪越勉勵數年傑出鄉黨年十九遊江戶入昌平黌師古賀侗庵依田匠里傍學于松崎謙堂學資或不繼晝則為人傭書夜則刻苦誦讀往往徹曉不閉目人目以鰥魚昌平以勤學稱者前後三人先生居其一學大進年二十五卜居駒籠授徒名頗著尾張僖公聞之召列儒官懿公任侍講玄同公深信之禮遇甚渥自小納戶格陞物頭班講後問以國事公之治績先生啓沃與有力焉既而任藩邸弘道館督學亡幾命歸尾張行藩校明倫堂督學事明治之初藩廢下帷城南四方來學者雲集其名大揚文部省賚硯及六國史賞之晚年移住東京斯文學會屬講師二十一年先生年八十八門人故舊相謀設壽宴會者百餘人清儒俞曲園等寄詩賀之二十四年二月十四日病終距生享和元年八月一日壽九十有一葬牛籠原街專念寺塋前配吉田氏生一男後配篠氏生一女皆夭養同藩同姓友政子雲韶奉祀先生為人方正謹飭居常危坐縹(相)中赫暑燦金亦不動容接人樂易無圭角循循勸誘不倦臨時明敏善斷又能納人言幡然改遷不少吝初修古學弱冠知洛闔為正宗奉之四子六經莫所不究而尤邃易中庸著周易叢說中庸講義傍通諸子老莊韓非皆有成解而玄同公好老子命作講義恒置座側征長之役亦齋往後謂先生曰余陣中處事多依此先生又嘗曰老家主氣儒門主理古今學術不出二者又明和漢史乘見史記律書多訛謬作律書私記病清史未備編清朝史略文辭亦典雅淵粹不負儒者之作有牧山樓詩文鈔其他韻法字書醫方星象浮屠著泰西之書莫所不涉獵年踰耄目耕肘書夙夜孜孜不異少壯之時云頃者雲韶介人寄狀速碑銘余與先生一再相見于斯文學會未及叩底蘊而永訣今讀狀傾服不能已乃作銘曰

貧而勤學	于嗟匡衡	博而純正	于嗟考亭	老而講習	于嗟伏生
世儒泛駁	學則弗厚	浮名無實	奚期不朽	于嗟先生	遺書萬壽
明治三十四年二月				福岡欽崇書	